

111 年附中語文競賽客家語朗讀文章國小學生組

編號 8 號

【祕密森林】林貴珠原作

佢從細盡好在山林肚、河壩脢搞寮，一到放寮日就一哪仔野上野下搞到斷烏正轉屋，記得讀小學該下，總係好跣阿娥厥姆去美濃山下拈樵。阿娥厥爸盡早就過身咗，單淨倚恃厥姆做小工來畜一屋大細，阿娥盡知人我，放寮日都會跣厥姆去山肚拈樵相添，佢輒常跣衫尾，同佢兜共下去山林肚遶寮，對佢來講這座山林肚全全寶。

打早佢就帶等飯筲仔同佢兜共下去，在山林肚佢兜搞園分人尋，同這一大片个山林變做佢兜个運動坪縱上縱下¹，在樹頂蹶上蹶下無輸山猴仔，麼个愁慮早就飛走哩，飛到天仔恁高，佢个心情就像著等靚靚花裙在該跳舞个揚蝶仔，飛上飛下恁自在、恁快樂。走到汗流脈落就去山坑脢搞水，山坑水清又清、淋一口透心涼，坑水涼又甜，較贏雜貨店个枝仔冰。續等貶石頭捉蝦公、捉毛蟹、捉魚仔，唱等佢自家个山歌，快樂个歌聲跣等坑水傳遍歸隻山窩壠壁，流過莊頭，流到闊野野个天際。

成時會有膨尾鼠來做伴，厥面頰卵蠕蠕動看等佢兜手項个

零嗒，錫到厥口涎水強強就會跌下來哩，盡得人惜；還有領領拜个山狗太，佢看你，你看佢，成時又自家搞到四腳惹天，盡生趣。行到笏竹頭下聽著唧唧滾个聲音，佢兜就摺手項銅笏仔裝湊个水 灌入地泥个空仔，無幾久就看著另外一個空仔趲出土狗仔來，一隻、兩隻下擺仔做得透著三、四隻个土狗仔。搞到瘰哩坐在香絲樹下，山風柔柔吹過樹林，聽等土狗仔唧唧滾挨弦仔，山坑水同笏竹和出大自然个樂曲，這係最錫人聽个大自然音樂。

暢樂个時間總係恬恬仔溜啊過，一瞞目就到斷烏哩愛轉屋咧，猴嫲背等猴子攀籬吊壁愛轉竇，佢兜就踏等紅霞下山，貓頭鳥咕咕滾同佢兜講：「正來寮！」阿伯姆揸等滿滿个幸福，佢乜袋等湊湊个快樂轉來，感謝這座山林加添佢生趣又無共樣个童年生活，感謝一路里來陪等佢成長个好山好水，對佢來講搞上搞下 毋當美濃山下，這係吾心肝肚最靚个祕密森林。

1 縱上縱下：音 jiung／ song／ jiung／ ha／；跑來跑去。